



**Centrala da s-chodamaint - diversas dumondas d'attach**

La nouva centrala da s-chodamaint in Cul a Zernez ha pudü gnir tutta in funcziun sco planisà süls 1. november 2017. Fin al di d'hoz sun entradas fingià diversas dumondas per tachar vi dal s-chodamaint da chalur central, quai chi fa fich plaschair.

**Cataster cumünal – surdatta d'incumbenzas**

Il Chantun Grischun prescriva cha'ls cumüns hajan da definir ün incumbenzà per l'administraziun da datas. Las incumbenzas per l'administraziun da datas, per manar davo las datas dal cataster da lingias sco eir la lavur da manar il Web-GIS sun gnüdas surdattas al büro Darnuzer Ingenieure AG a Tavo.

**Controla da gestiun inviern 2018 tras la cumischiun sindicatoria**

Cumanzamaint schner 2018 ha la cumischiun sindicatoria manà tras la controla da gestiun. La direcziun operativa ha tut incunter la notizcha d'acta e tilla ha elavurada. La resposta es gnüda preschantada e sancziunada da la suprastanza.

**Ouvra electrica Susasca Susch (OESS SA) – elecziuns i'l cussagl administrativ**

Sco rapreschantants da la società anonima sun gnüts propuonüts ed elets pels prossems trais ons d'uffizi Emil Müller, Seraina Bickel e Stefan Bühler sco commembers dal cussagl administrativ.

**Ouvra electrica Lavinuoz Lavin (OELL SA) – elecziuns i'l cussagl administrativ**

Sco rapreschantants da la società anonima sun gnüts propuonüts ed elets per la perioda d'ün on Linard Martinelli e Jachen Gaudenz sco commembers dal cussagl administrativ.

**Rendaquint 2017**

La suprastanza cumünala ha repassà detagliadamaing il rendaquint 2017 insembel culs revisurs da la Lischana Fiduziari SA da Scuol, cun la cumischiun sindicatoria e la direcziun operativa. Il rendaquint es gnü approvà e deliberà a man da la radunanza cumünala dals 28 gën 2018.